



776



30-05-2017

Broj: 11-05-38-15390/17
Sarajevo, 22.5.2017. godine

SKUPŠTINA KANTONA SARAJEVO
n/r Ane Babić, predsjedateljica Skupštine Kantona Sarajevo
- ovdje-

POSLANIČKO PITANJE

Na 28. Radnoj sjednici Skupštine Kantona Sarajevo, održanoj 26.4.2017. godine, u okviru tačke Dnevnog reda „Zastupnička pitanja, inicijative i odgovori“, a u skladu sa Poslovnikom Skupštine Kantona Sarajevo, zastupnica Bibija Kerla je postavila zastupničko pitanje u vezi sa eksternom maturom u srednjim školama, koje glasi:
„Šta je i dokle se došlo sa eksternom maturom“?

ODGOVOR

Dostavljamo odgovor u vezi sa postavljenim poslaničkim pitanjem.

Zakonom o srednjem obrazovanju, koji je Skupština Kantona Sarajevo donijela na svom zasjedanju u maju 2017. godine, kao što Vam je poznato, predviđena je eksterna evaluacija znanja učenika na kraju školovanja.

Na ovaj način su se stekle zakonske mogućnosti za uvođenje eksterne mature nakon završene srednje škole u Kantonu Sarajevo.

U ovoj i prethodnoj školskoj godini Ministarstvo je realiziralo pilot projekat – probna eksterna matura, s ciljem uočavanja eventualnih nedostataka u stručnom i tehničkom smislu koji podrazumijevaju organiziranje eksterne mature.

Na ovaj način su nastavnici, učenici i roditelji bili upoznati sa modelom polaganja eksterne mature.

Direktori srednjih škola su informirani u vezi sa namjerom da se matura polaže nakon završenog 4. razreda srednje škole, a učenici koji pohađaju srednje škole u četverogodišnjem trajanju imaju obavezu pristupiti polaganju eksterne mature.

S obzirom da je jedno od najvažnijih pitanja u vezi sa pripremom učenika za polaganje eksterne mature, postojanje adekvatnih materijala za pripremu, **Ministarstvo je objavilo na web stranici još prošle školske 2015/2016. godine vodiče za nastavne predmete iz kojih se polaže eksterna matura - Bosanski, hrvatski, srpski jezik i književnost, Matematika i prvi strani jezik.**

Vodiči sadrže obrazovne ishode, za koje želimo utvrditi da li su ih učenici ostvarili tokom četverogodišnjeg školovanja, te su bazirani na zajedničkoj jezgri nastavnih planova i programa za srednju školu.

Takođe, u martu 2017. godine su objavljeni katalogi pitanja iz spomenutih predmeta koji sadrže po 200 pitanja i predstavljaju kvalitetnu osnovu za pripremanje učenika za eksternu maturu.

Ministarstvo je već pokrenulo aktivnosti na usaglašavanju određenih pitanja sa visokoškolskim ustanovama, koja se između ostalog, odnose na mogućnost priznavanja rezultata eksterne mature prilikom upisa na određenu visokoškolsku ustanovu na području Kantona Sarajevo.



Međutim, kako na ovaj način učenici koji su završili srednje škole na području Kantona Sarajevo ne bi bili u neravnopravnom položaju u odnosu na učenike koji su srednju školu završili izvan područja Kantona Sarajevo, a svoje visokoškolsko obrazovanje imaju namjeru nastaviti u ovom kantonu, potrebno je pronaći adekvatan model i u vezi sa ovim pitanjem.

Koristimo se ovom prilikom da Vas informiramo da se u protekle dvije godine na nivou Bosne i Hercegovine realizira projekat pod nazivom „Razvoj kvalifikacijskog okvira za opšte obrazovanje“, koji finansira Evropska komisija, a implementira British Council.

Jedan segment ovog projekta se bavi pitanjem provođenja eksterne mature nakon završene srednje škole, a ovo ministarstvo je aktivno uključeno u realiziranje navedenog projekta i u potpunosti smo spremni podržati prijedlog da se na nivou Bosne i Hercegovine polaže eksterna matura, čiji bi rezultati bili priznati učenicima na svim univerzitetima u Bosni i Hercegovini i van granica naše države.

Takođe, ističemo da je u toku donošenje Zakona o visokom obrazovanju, koje treba da reguliše pitanje eksterne mature, a podzakonskim aktom bi se trebala riješiti sva ostala pitanja u vezi sa navedenom problematikom.

Ističemo da će se sav proces realizirati isključivo u saradnji sa Univerzitetom u Sarajevu, odnosno akademskom zajednicom.

Nažalost, polaganje eksterne mature na nivou Bosne i Hercegovine, predstavlja političko pitanje, te očekujemo da će donosioci političkih odluka u najskorije vrijeme shvatiti važnost i značaj ovog pitanja za sve mlade ljude u našoj državi.

S poštovanjem,



web: <http://www.monks.ba>

e-mail: monks@ks.gov.ba

Tel: + 387 (0) 33 562-128, Fax: + 387 (0) 33 562-218

Sarajevo, Reisa Džemaludina Čauševića 1

